

23/05/2000

Sothinathan calon BN Teluk Kemang

KUALA LUMPUR, Isnin - Barisan Nasional (BN) hari ini memilih anak kelahiran Port Dickson, S G Sothinathan, 40, (gambar) untuk bertanding pada pilihan raya kecil Parlimen Teluk Kemang, Negeri Sembilan, 10 Jun depan.

Pemilihan Sothinathan yang juga Setiausaha Politik kepada Menteri Kerja Raya, Datuk Seri S Samy Vellu itu diumumkan oleh Perdana Menteri, Datuk Seri Dr Mahathir Mohamad.

Sothinathan yang pernah berkhidmat sebagai pensyarah di Akademi Locke, Seremban, adalah lulusan sarjana muda ekonomi Universiti Malaya dan sarjana muda undang-undang dari Universiti London.

"Calon BN untuk pilihan raya Teluk Kemang ini adalah seorang peguam sebelum berkhidmat sebagai setiausaha politik," katanya pada sidang akhbar di sini, hari ini.

Turut hadir Menteri Besar Negeri Sembilan, Tan Sri Mohd Isa Samad; Presiden MIC, Samy Vellu; Setiausaha Agong Umno, Tan Sri Khalil Yaakob dan Sothinathan.

Suruhanjaya Pilihan Raya (SPR) menetapkan 30 Mei ini untuk penamaan calon dan 10 Jun untuk pengundian bagi pilihan raya kecil itu, berikutan kematian S Anpalagan dari BN pada 28 April lalu.

Mendiang Anpalagan, 37, yang juga Setiausaha Parlimen Kementerian Kesihatan, adalah antara nama yang disebut-sebut bagi pemilihan menjadi anggota Jawatankuasa Kerja Pusat MIC dalam pemilihan parti 27 Mei ini.

Barisan alternatif pula meletakkan Ketua Penerangan Parti Keadilan Nasional, Ruslan Kassim, juga seorang peguam.

Pemilihan Ruslan yang juga Ketua Perhubungan Keadilan Negeri Sembilan diumumkan dalam satu kenyataan yang ditandatangani bersama Presiden Keadilan, Datin Seri Dr Wan Azizah Wan Ismail; Presiden Pas, Datuk Fadzil Noor; Setiausaha Agung DAP, Kerk Kim Hock dan Presiden Parti Rakyat Malaysia (PRM), Dr Syed Husin Ali.

Sementara itu, Samy Vellu berkata MIC memilih seorang calon yang berpengalaman dan bersemangat tinggi untuk berkhidmat kepada rakyat tanpa mengira bangsa dan agama.

"Saya mengucapkan terima kasih kepada Perdana Menteri kerana memilih Sothinathan yang mempunyai banyak pengalaman untuk berkhidmat kepada rakyat," katanya.

Beliau berkata, parti itu juga meletakkan calon muda seperti mendiang Anpalagan bagi menggantikannya, selaras dengan sasaran MIC untuk meningkatkan pembabitan darah muda dalam kegiatan parti.

Katanya, pemilihan calon muda juga akan membuka peluang kepada mereka untuk dilantik memegang jawatan dalam kerajaan memandangkan MIC diperuntukkan tujuh kerusi Parlimen dan 15 kerusi Dewan Undangan Negeri.

(END)